



Allianz von Humanisten  
Atheisten & Agnostiker

## Feminismus – eng nei Relioun ?

Carte blanche vum Laurent Schley op RTL-Radio

13.03.2017

*De leschte Mëttwoch war den internationalen Dag vun de Fraerechter. Puer Deeg virdrunn hat de polneschen Europadeputéierten Janusz Korwin-Mikke zu Stroosbuerg mat fraefeindléche Remarquen op sech opmierksam gemaach. Sinn d’Fraerechter a Gefor? Doriwer puer Iwwerleeunge vum Laurent Schley a sénger Carte blanche mam Titel „Feminismus – eng nei Relioun?“*

Heiando héiert ee reaktionär Stëmme, och zu Lëtzebuerg, déi op eng méi oder och manner subversiv Manéier d’Gläichberechtigung vu Mann a Fra an der Gesellschaft a Fro stellen. Dobei gi bewosst Saache vermëscht: Gender-Theorie, Fraequot, Feminismus... De Feminismus gett diskreditéiert, andeems en als reliéis Ideologie dohigestallt gett.

An Zäiten, an deene “fake news” an “alternativ Fakten“ Tromp sinn, wier et sënnvoll sech nees op d’Etymologie, also op den ursprénglechen an eigentleche Sënn vun de Wieder ze besënnen.

D’“Gender-Theorie” oder “théorie du genre” geet zréck op de laténgesche Begrëff “Genus”, deen als éischt Bedeutung “Kategorie, Typ oder Aart“, a réischt als zweet Bedeutung “Geschlecht” huet. Nodeems den Term fir d’Éischt um Enn vum 19. Jorhonnert gebraucht gouf, entfaalt sech d’Konzept vun den “études du genre“ an de 50er Joren am psychiatreschen a medezineschen Milieu. Ab de 70er gouf de Begrëff “Genre” dann heefeg vu Feministinnen gebraucht, fir ze beweisen, datt d’Ongläichheeten tëscht Männer a Fraen éischer op sozial, kulturell an ökonomesch Facteuren zréckzeféire sinn wi op biologesch Differenzen.

Wubäi mer da beim Feminismus wieren. Wee Feminismus als Relioun bezeechent, ignoréiert bewosst, dass 1. de Feminismus eng Bewegung ass bei där et ëm d’Gläichberechtigung vu Mann a Fra geet, di op d’Emanzipatioun vun der Fra ziilt, op hir Gläichstellung mam Mann an der Gesellschaft, an ignoréiert 2. dass op där anerer Säit d’Reliounen, virun allem di monothéistesche, sech nierwt dem Glawen un een iwwernatierlecht – a wuel männlecht – Wiesen duerch eng jorhonnertelaang Ënnerdréckung an Diskriminéierung vun der Fra auszeechen, zum Deel och nach haut. Et muss een also feststellen, datt di zwee Begrëffer Feminismus a Relioun net méi widdersprécklech kéinte sinn.



Allianz vun Humanisten  
Atheisten & Agnostiker

Feminismus ass keen Interesseveräin vu frustréierten, psycho-sexuell gestéierten oder frigde Fraen. Et ass eng humanistesche opkläreresch politesch Bewegung vu Fraen a Männer, déi reell Ongerechtegkeeten an der Gesellschaft wëlle verschwannen dinn.

Dass déi Stëmme, di d'Gläichstellung vu Mann a Fra a Fro stellen, aus dem monotheistesche-religiöse Milieu kommen oder deem politesch staark verbonne sinn, ass net verwonnerlech. An genau dat weist, dass ee muss oppassen, dass déi gesellschaftlech Errungenschaften a Westeuropa, di géint den erbatterte Widderstand vun de Reliounen an hiere politeschen Acolyten erkämpft goufen, elo net nees vu deenen an d'Viséier geholl ginn. Et heescht deemno vigilant bleiwen.

*Allianz vun Humanisten, Atheisten an Agnostiker Lëtzebuerg a.s.b.l. (AHA), [www.aha.lu](http://www.aha.lu)*

Mitglied *International Humanist and Ethical Union* (IHEU)

Mitglied *European Humanist Federation* (EHF)

Mitglied *Alliance for a Secular Europe*

Mitglied *Cercle de Coopération des Associations laïques* (CCAL)